


TEZAU LITURGIC
18 IUNIE

SLUJBA
SF. CUVIOS
LEONTIE
DE LA
PECERSKA



MINEIUL PECERSKĂI-02
KIEV, 2007



Мѣсяца Іунія въ 18-й день Служба преподобному Леонтію, канонарху Печёрскому

НА ВЕЧЕРНИ,

На Господи, воззвахъ, **стихирѣ на 6, гласъ 8.**

Подобень: О, преславнаго чудесе.

Преподобне отче Леонтіе,* ты въ Печёрстѣй обители* Богу добръ послужилъ еси,* въ пещерѣ темнѣй подвижался еси* и достойный первоначальниковъ нашихъ ученикъ былъ еси,* тѣмже ты Христось Господь* во славу небснаго Царствія вчини,* тѣло твое многоподвижное нетлѣніемъ и чудотвореніи прослави,* Тому помоліся, преподобне, спасти души наша. **[Дважды.]**

Преподобне отче Леонтіе,* во всю страну Россійскую* изыде слава равноангельнаго твоего житія,* имже обитель Печёрскую духовно облагоухаль еси,* яко кринь благовонень, въ пещерѣ насажденный* и водою Божія благодати орошенный,* тѣмже возрасль еси въ древо чудоточное* Вышняго вертограда Христова* и приносиши плоды, воистинну спасительныя душамъ нашимъ. **[Дважды.]**

Преподобне отче Леонтие,* твоя труды и подвиги,* бдѣнія и пощенія* и пещерная злостраданія кто изочтеть?* Въ святѣй же памяти твоей* днесь лавра свѣтло ликуеть,* таковаго избранника духовно возрадивъ* и истиннаго угоднаго Христа Бога;* Тому помолися, богоносне, спасти души наша. **[Дважды.]**

Слава, гласъ 6:

Иже по образу Евангелія Христова житіе твое поставивъ, постнически пребывалъ еси, мужески естество понудивъ, да плоть поработиши духу, всякое злостраданіе съ любовію терпѣлъ еси, яко истинный ученикъ небеснаго Учителя Христа, и нынѣ, на небеса преселився, лице Того пресвѣтлое зриши, отче нашъ Леонтие, и молишися благопріятно о вѣроу и любовію чтущихъ святую память твою.

И нынѣ, богородиченъ догматикъ: Кто Тебѣ не ублажить...

На стиховнѣ стихиры, гласъ 2. Подобенъ:
Доме Евфраѳовъ:

Леонтие, отче нашъ,* въ житіи подобяся Христу,* по смерти силу Того воскресенія* нетлѣніемъ тѣла показуеши,* моляся о душахъ нашихъ.

Стихъ: Честна́ предъ́ Господемъ* смѣръть преподобныхъ Его́.

Приста́нище немятежное* Печѣрскія обители достигль еси,* послушливъ бывъ уставомъ* преподобныхъ отецъ Анто́нія и Θεодо́сія.* Съ нимиже моли́ся о душа́хъ нашихъ.

Стихъ: Блаже́нь му́жь, боя́йся Го́спода,* въ заповѣдехъ Его́ восхо́щеть зѣло́.

Гла́дь и жа́жду* терпѣливо́ понёслъ еси,* поко́й тѣлесный возненави́девъ,* а́нгель во плоти́ и челове́къ небесный́ бывъ,* Лео́нтіе, о́тче нашъ.

Слава, гласъ 8:

Мона́ховъ о́бразъ и пра́вило извѣстное, почита́емъ тя, о́тче нашъ Лео́нтіе, ла́вры Печѣрскія сла́ва и похва́ло. Въ нейже трудолю́бно подвиза́вся, Бо́гу до́брѣ угоди́ль еси, а́нгеловъ собесѣднице́ и преподобныхъ удо́брѣніе, съ нимиже моли́ся Го́сподеви поми́ловати ду́ши наша.

И ны́нѣ, богоро́дичень, гласъ тойже:

Безневѣстная́ Дѣво...

Тропа́рь преподо́бному Лео́нтію канона́рху, гласъ 3:

Всечестный́ канона́рше Лео́нтіе, правилонача́льный бывый въ це́ркви и въ пра́вилѣ иночестѣмъ возсія́вый свѣ́тло, моли́

Христа́ Бо́га, да прегрѣшеній оставленіе подасть душамъ нашимъ.

НА УТРЕНИ,

По 1-мъ стихословіи съдалень, гласъ 1:

Ангельская ликостоянія собесѣдника тя имуть, отче богоносе Леонте, и Самъ Владыка ангель Христось Господь, тобою на земли прославленный житія чистотою, увѣнча тя вѣнцемъ нетлѣннымъ славы небесныя, Емуже со дерзновеніемъ молишися о душахъ нашихъ. **[Дважды.]**

Слава, и нынѣ, богородиченъ, гласъ тойже:

Гласъ Гаврііловъ приносимъ Ти, Чистая Дѣво: радуйся, зачѣншая Творца всѣхъ Бо́га и обновляшая обетшавшее человѣческое естество; радуйся, яко была еси въ рождествѣ Дѣва, и по рождествѣ Дѣва паки пребываеши.

По 2-мъ стихословіи съдалень, гласъ 4:

Отрекся плоти угожденія любве ради Христа́ Бо́га, отче Леонте, въ обитель Печѣрскую вселился еси и копіемъ молитвы непрестанныя главу всезлѣбнаго змія сокрушилъ еси, богоноснымъ отцемъ Антонію и Θεодосію спѣстникъ и собесѣдникъ бѣвъ, тѣхъ стезямъ неуклонно послѣдовалъ еси, съ нимиже

блаже́нство райское обрѣ́тъ, моли́ся Христу́ Бо́гу
о чту́щихъ любви́ю святу́ю па́мять
твою́. **[Два́жды.]**

Сла́ва, и ны́нѣ, богоро́диченъ, гласъ то́йже:

Кто́ досто́йно восхва́литъ рождество́ Твое́,
Пречи́стая? Безсѣ́менно бо зачала́ еси́ отъ Ду́ха
Свята́го и прѣ́жде вѣ́къ отъ Отца́ рожденное
Сло́во въ лѣ́то родила́ еси́, тѣ́мъ Тя, я́ко
исти́ннаго Бо́га нашего́ Ма́терь, въ пѣ́снѣхъ
чту́ще, поѣ́мъ и велича́емъ.

Кано́нъ преподо́бнаго, гласъ 8.

Пѣ́снь 1.

Ирмо́сь: *Колесницегонителя фарао́ня погрузи́
чудотвори́й иногда́ Моисе́йскій жезль,
крестообра́зно порази́въ и раздѣ́ливъ мо́ре,
Изра́иля же бѣ́глеца́, пѣ́шихода́ спасе́, пѣ́снь
Бо́гови воспѣ́вающа.*

Христу́, на́съ ра́ди смири́вшемуся, во
смирѣ́нии подража́ль еси́, преподо́бне, во убо́зѣй
и темнѣ́й пеще́рѣ живы́й, постомъ́, моли́твою и
мно́гими слеза́ми ри́зу душе́вную убѣ́лилъ еси́, и
чистото́ю сия́я, возше́ль еси́ во обители́ го́рнія,
ра́достно пѣ́снь Го́сподеви воспѣ́вая.

Яко звѣ́зда богосвѣ́тлая, сия́еши на
мы́сленнѣ́мъ небеси́ ла́вры Пече́рскія, о́тче на́шъ
Лео́нтіе, и вся́ ны́ блгодáтно оза́ряеши
немерца́ющею заре́ю мно́гихъ чудесъ́, тѣ́мже,

свѣту́ю па́мять твою́ лю́бовію соверша́юще,
пѣ́снь Бо́гови воспѣ́ваемъ.

Истинный и вѣ́рный ра́бъ Христо́въ бы́лъ еси́,
богоно́сне о́тче Лео́нтіе, свѣты́хъ
первонача́льниковъ Печѣ́рскихъ Анто́нія и
Ѳеодо́сія подража́телю и добродѣ́телей ихъ
наслѣ́днице, съ ни́миже ны́нѣ во сла́вѣ
невече́рнѣй свѣты́хъ пѣ́снь Бо́гови воспѣ́ваеши.

Богородичень: **З**ако́новъ кро́мѣ
естѣ́ственныхъ родила́ еси́ Законода́вца, Бо́га и
Человѣ́ка, Того́, яко́ Блага́, моли́, Всенепоро́чная,
на́ша беззаконі́я презрѣ́ти, гласы́ хвале́бными
пѣ́снь Е́му воспѣ́вающихъ.

Пѣ́снь 3.

Ирмо́сь: *Утвержде́й въ нача́ль небеса́
ра́зумомъ и зе́млю на вода́хъ основа́вый, на
ка́мени мя́, Христе́, заповѣ́дей Твои́хъ утверди́,
яко́ нѣ́сть свѣ́тъ па́че Тебе́, Еди́не
Человѣ́колю́бче.*

Тлѣ́нную плоть неосла́бными труда́ми крѣ́пко
изнури́лъ еси́, о́тче на́шъ Лео́нтіе, и по кончи́нѣ
твоей въ нетлѣ́ніе та́ облече́ся благода́тію Христа́
Бо́га, Е́муже въ го́рнихъ оби́телехъ зове́ши,
ра́дуясь: нѣ́сть свѣ́тъ, па́че Тебе́, Еди́не
Человѣ́колю́бче.

Яко ма́слина благопло́дная, на горѣ́ Печѣ́рстѣ́й
возра́слъ еси́, преподо́бне Лео́нтіе, о́тче на́шъ, и

елеемъ трудовъ твоихъ богоугодныхъ сердца
наша благодатию умащаеши, въ мѣро бо
цѣлебное слезы твоя постническія претвори
Христось Богъ, Емуже зовемъ: нѣсть святъ, паче
Тебе, еди́не Человѣколюбче.

Страсти душевныя мечемъ молитвы
непрестанныя изсѣклъ еси, преподобне, и
крѣпко вооружилъ еси на враги невидимыя,
ихже козни въ пещерныхъ оградахъ разрушилъ
еси, зовый Подвигоположнику Христу: нѣсть
святъ, паче Тебе, Еди́не Человѣколюбче.

Богородичень: Херувимовъ и серафимовъ
превыши явилася еси, Богородице, Ты бо
еди́на прияла еси невмѣстимаго Бога во чревѣ
Твоемъ, Всечистая, тѣмже Тя, вси вѣрнии,
пѣснями ублажаемъ.

Сѣдалень, гласъ 8:

Яко истиннаго постника Господня и вѣрнаго
Христова послѣдователя лавра Печерская по
долгу тя почитаетъ, Леонти́е, отче нашъ, въ ней
бо подвизался еси богоугодно и сномъ
праведнымъ почилъ еси, ибо смѣрът угонниковъ
Божіихъ войстинну сонъ естъ и преселеніе отъ
хуждшія жизни на лучшую, въ нейже со
святѣими пребывая, моли Христа́ Бога спасти
души наша. **[Дважды.]**

Слава, и нынѣ, богородиченъ:

Паче естества заченшая и паче естества рождшая Зижделя Твоего и Бога, моли о насъ, присно согрѣшающихъ, да свободѣни суще, любовію воспоемъ Тя, Чистая Дѣво Маріе.

Пѣснь 4.

Ирмосъ: Ты моя крѣпость, Господи, Ты моя и сила, Ты мой Богъ, Ты мое радованіе, не оставль нѣдра Отца и нашу нищету посѣтивъ. Тѣмъ съ пророкомъ Аввакумомъ зову Ти: силъ Твоей слава, Человѣколюбче.

Духа Святаго нашѣствомъ въ сосудѣ души твоея богоносець былъ еси, преподобне отче, обитель Печѣрскую чудесы твоими прославиль еси, и нынѣ со ангелы поѣши во святыхъ почивающему Богу: силъ Твоей слава, Человѣколюбче.

Лице Христово пресвѣтлое зрѣти желая, темная лица дѣмонская крѣпкимъ терпѣніемъ посрамиль еси, отче нашъ Леонтіе, въ пещерѣ низу живый, яко градъ верху стоя, неуязвимъ стрѣлами вражіими пребыль еси, отонудуже удобно прешель еси на гору небесную звати въ вышнихъ Богу: силъ Твоей слава, Человѣколюбче.

Благодать Божія процвѣте на версѣ твоёмъ, преподобне, и яви тя чудодѣйственника

пресла́вна, тобо́ю бо ла́вра Пече́рская вои́стинну красу́ется, стяжа́вши въ нѣдрѣхъ своихъ тако́ваго избра́нника, иже въ вы́шнихъ селе́нияхъ лику́еть и зоветъ святы́хъ Святѣ́йшему Сло́ву: си́ль Твое́й сла́ва, Человѣ́колю́бче.

Богоро́диченъ: Очище́ние прегрѣше́ній на́шихъ испроси́, Влады́чице, ро́ждшая еди́наго безгрѣ́шнаго Спа́са всѣхъ, къ Нему́же Ма́тернее дерзнове́ние иму́щи, не зако́сни ко умоле́нию, Всеблагая́, да, раду́ющесея, Тебѣ́ зове́мъ: сла́ва Тебѣ́, всеси́льная челове́ковъ Помо́щнице.

Пѣснь 5.

Ирмо́сь: *Вску́ю мя́ отрину́ль еси́ отъ лица́ Твоего́, Свѣ́те незаходи́мый, и покрыва́ мя е́сть чужда́я тма́, окая́ннаго, но обрати́ мя къ свѣ́ту заповѣ́дей Твои́хъ пути́ моя́ напра́ви, молю́ся.*

Въ поще́нии проси́яль еси́, преподо́бне, хлѣ́бъ и во́ду мѣ́рою вкуша́ль еси́, мно́гажды же дни́ безъ пи́щи пребыва́я, тѣ́мже пи́щи нетлѣ́нныя райскія насыща́тися сподо́бился еси́, напра́вивъ пу́ть тво́й къ Си́ону небесно́му.

Умъ тво́й вперилъ еси́ къ Бо́гу, Лео́нтіе, о́тче нашъ, и, на землі́ живы́й, о небесныхъ прісно промышля́ль еси́, псаломски глаго́ля: кто́ дасть ми́ крилѣ́, я́ко голуби́нѣ, и полещу́, и почи́ю въ небесныхъ ски́нняхъ ра́я пресвѣ́тлаго, идѣ́же и на́мъ бы́ти помоли́ся.

Свѣтло житіе твоє бысть, преподобне отче, во вся концы земли нашея изыде слава добродѣтелей твоихъ, тѣмже духовно возрастившая тя лавра въ памяти твоѣй святѣй свѣтло ликуетъ и Христу зоветъ: Свѣтодавче благій, молитвами угодника Твоего на путь спасенія вся ны направи, яко Человѣколюбець.

Богородичень: Тя стѣну имуще и заступленіемъ Твоимъ соблюдаеми, Твоєю Божественною славою хвалящися, Тя ублажаемъ, Ты бо, Пречистая, душамъ нашимъ присно источаеши веселіе и радованіе.

Пѣснь 6.

Ирмосъ: *Очисти мя, Спасе, многа бо беззаконія моя, и изъ глубины золь возведи, молюся, къ Тебѣ бо возопихъ, и услыши мя, Боже спасенія моего.*

Память твоя съ похвалами, отче Леонтіе, и имя твоє святое призывается вѣрными, иже вѣдятъ тя богоносна и равноангельна житіемъ и съ упованіемъ прибѣгають къ молитвенному твоему заступленію. Сихъ услыши, егда возопіють къ тебѣ молебнo, и спасенія ходатай имъ буди выну.

О Христѣ укрѣпляемъ, жизнь твою доблестно препроводилъ еси, преподобне, безмолвіемъ крайнимъ, яко колесницею небовосходною, на

го́рняя восте́клъ еси́ и та́мо со а́нгелы лику́еши, и́бо услы́ша твоя́ моли́твы Бо́гъ спасе́нiя твоего́.

Неду́жная врачу́еши еди́нымъ прикоснове́нiемъ съ вѣрою къ святы́мъ мощемъ твоимъ, преподо́бне Лео́нтіе, о́тче на́шъ, и ми́лость мно́гу явля́еши тѣмъ, и́же по Бо́зѣ упова́нiе на тя возлага́ютъ и твою́ па́мять соверша́ютъ, я́ко и́стиннаго уго́дника Христо́ва.

Богоро́дичень: Вѣсь ли́къ проро́ческой отъ Бо́га науче́нь Твоего́ Божѣственнаго зачатiя провозгласи́ти та́инство, Пречи́стая Ма́ти Дѣво, Ты́ бо Свѣтъ во открове́нiе язы́ковъ роди́ла еси́, Христа́, Царя́ и Бо́га, спаса́шаго отъ поги́бели родъ челове́ческой.

Конда́къ, гла́съ 4:

Кано́нархiствуя, честны́й кано́нарше Лео́нтіе, и пѣ́нiе церко́вное пою́щимъ предводи́тельствуя въ це́ркви, уподо́бился вои́стинну а́нгеломъ, пою́щимъ Бо́га на небеси́, и́хже и житiю подража́я, и, съ ни́ми ны́нѣ лику́я, помина́й ны́, любове́ию хваля́щихъ тя.

Икосъ:

А́нгеловъ подража́теля и безплотныхъ си́лъ собесѣ́дника, а́нгельскими язы́ки подоба́етъ ублажи́ти тя, преподо́бне, оба́че приими́, а́ще и отъ челове́ческихъ брѣ́нныхъ усте́нь, сiю́ достодо́лжную тебѣ́ похвалу́: раду́йся,

преподобне, во всѣхъ заповѣдехъ Господнихъ право ходивый; радуйся, богоносне, иго благое и легкое на раменахъ твоихъ носивый. Радуйся, въ молитвѣ преуспѣвый; радуйся, пещерною тѣснотою пространства небеснаго достигнувый. Радуйся, равноангельно во плоти поживый; радуйся, нетлѣниемъ благодатнымъ прославленный. Радуйся, чудотворенія даромъ обогащенный; радуйся, цѣлебниче всякихъ недуговъ. Радуйся, помощниче въ бѣдахъ и напастѣхъ; радуйся, Антонія богоноснаго подражателю. Радуйся, Θεодосія богомудраго послѣдователю; радуйся, Леонтіе, молитвенниче о душахъ нашихъ.

Пѣснь 7.

Ирмосъ: *Божія снизхожденія огонь устыдѣся въ Вавилонѣ иногда. Сего ради отроцы въ пещи, радованною ногою, яко во цвѣтницѣ, ликующе, пояху: благословенъ еси, Боже отецъ нашихъ.*

Міра красоты душетлѣнныя во умѣты вмѣнилъ еси, отче преподобне Леонтіе, жестокое житіе показалъ еси и неослабно въ подвизѣхъ жизнь временную препроводилъ еси, немолчно воспѣвая укрѣпителю Іисусу: благословенъ еси, Боже отецъ нашихъ.

Въ тихомъ пристанищи спасенія бѣвѣ, тихими вѣтры Духа Святаго управляемъ, отче богомудре

Леонтіе, достигль еси желаній края, пресвѣтлаго Царствія Христова, идѣже, со святыми почивая, причащаешися трапѣзы безсмертнаго Владыки Христа и зовѣши Ему радостно: благословѣнь еси, Боже отецъ нашихъ.

Имущи тя лавра Печѣрская свѣтильника немерцающаго Божія благодати, твоѣ подвиги пѣнїи духовными прославляетъ, яко мати, о чадѣ своемъ веселящися, отче Леонтіе, монаховъ удобрѣние и постниковъ похвало, тѣмже и зовѣтъ въ памяти твоѣй боголѣпно: благословѣнь еси, Боже отецъ нашихъ.

Богородичень: Жѣзль, изъ корене Іессеева прозябшій, и цвѣтъ спасительный, міру процвѣтшій, познаваемъ Тя, Пречистая Дѣво, рождшая Христа Жизнодавца, Имже упразднися идольская прелестъ благодатию. Тѣмже Тебѣ, яко главизнѣ спасенія нашего, усердно вопіемъ: благословѣнна еси въ женахъ, Пренепорочная Владычице.

Пѣснь 8.

Ирмосъ: *Седмерицею пѣщь халдеѣскій мучитель Богочестивымъ неистовно разжжѣ, силою же лучшею спасены сѣя видѣвъ, Творцѣ и Избавителю вопіяше: отроцы, блгословите, священницы, воспойте, людіе, превозносите во вся вѣки.*

Свѣтолітія небеснаго исполнился еси, преподобне, егда, свято поживъ, кончиною праведнаго прешель еси отъ земли въ горняя, намъ же честныя мѹщи твоя, яко наслѣдіе многоцѣнное, оставилъ еси, цѣлебныя струи отъ нихъ источая, съ вѣрою къ тебѣ приходящимъ и Христа превозносящимъ во вся вѣки.

Молитвою твоєю богопріятною, ѹтче, обитель Печѣрскую сохраняеши отъ всякаго злаго обстоянія и въ ней живущія во благочестіи наставляеши образомъ твоимъ благимъ, скорый помощникъ являешися людемъ правовѣрнымъ, иже по Бозѣ и Богородицѣ упованіе на тя возлагаютъ и тя прославльшаго Христа превозносятъ во вся вѣки.

Въ пощеніихъ неослабенъ, въ молитвахъ бодръ, въ трудѣхъ терпѣливодушный показался еси, ѹтче нашъ Леонтіе, и яко во всѣхъ благоискусень дѣлатель вертограда Христова, мзду богатую воспріялъ еси отъ небеснаго Домовладыки, въ Егоже чертозѣ свѣтлѣмъ упокоеніе блаженное обрѣлъ еси, зовый: людіе, превозносите Христа во вся вѣки.

Богородичень: Златозарный Тя свѣтильникъ, пріемшую несказанно Свѣтъ Непреступный, Имже озарися мракъ падшаго челоуѣка, воспѣваемъ Тя, Богородице Дѣво, Солнца облаче

лѣгкій, Егѡже лучами озарѣни, благодарно поѣмъ Тя, Чистая, во вся вѣки.

Пѣснь 9.

Ирмосъ: Ужасѣся о сѣмъ небо, и земли удивишася концы, яко Богъ явися человекомъ плѣтски и чрево Твое бысть пространнѣйшее небесъ. Тѣмъ Тя, Богородицу, ангеловъ и человекъ чиновачалія величаютъ.

Воистинну тя учителя благочестія имать обитель Печѣрская, ученія духовная, меда сладчайшая, изливающая. Кто бо не умилится, слыша твоя подвиги пощенія, злостраданія и непрестанныя молитвы, спасенія ради душевнаго? Тѣмже тя, отче нашъ Леонтіе, вѣрою и любовію ублажаемъ.

Любовію Христовою воспламенивъ твоѣ сѣрдце, пламень нечистыхъ страстей угасилъ еси росю Духа Божественнаго, Егѡже благодатию соблюдаемъ, отче нашъ Леонтіе, не осквернилъ еси чистоты души твоея, сохранилъ еси непорочно и тѣло твое, нетлѣніемъ нынѣ почтенное, отъ негоже цѣльбы подаеши недужнымъ, яко тайникъ Божія благодати.

Живонѡсную силу Воскресенія Христова намъ проявляеши, преподѡбне, въ твоихъ тлѣнію непричастныхъ и многоцѣлебныхъ мощехъ. Въ сѣмъ бо воистинну познахомъ, яко, душею

живый, престолу Господню со славою предстоиши, идиже не забуди въ молитвахъ твоихъ богоприятныхъ градъ и обитель, въ нихже на земли подвижался еси, и всѣхъ насъ, чтущихъ любовію память твою.

Богородичень: Псаломски воспѣваемъ Тя, Обрадованная, Чистая, и со архангеломъ, благовѣстникомъ радости всемирныя, немолчно, — радуйся, — Тебѣ поемъ, Ты бо, Владычице, воистинну всѣмъ источила еси радование, рождши радости виновное Слово.

Свѣтилень:

Процвѣлъ еси, яко финиксъ, отче, и, яко кедръ, умножилъ еси дарованія благодатная, яже ты славна въ лаврѣ Печерстѣй показаша. О насъ Христа Бога моли, чудодѣйственниче Леонтіе, почитающихъ пречестную память твою. **[Дважды.]**

Слава, и нынѣ, богородичень:

Радуйся, неоранная ниво, возрастившая класъ несѣянный, изъ негоже хлѣбъ спасительный міру сотворися; симъ напитай души любовію чтущихъ пречистое зачатіе Твое, Чистая Дѣво.

На хвалі́техъ стихи́ры, гласъ 2. Подо́бенъ:

Егда́ отъ дрѣ́ва.

Егда́ при́иде на тя́ зва́ніе Божѣ́ственное,* преподо́бне о́тче на́шъ Лео́нтіе,* ми́ръ оста́вилъ еси́* и благоо́тишіе оби́тели Пече́рскія возлю́билъ еси́,* въ не́йже трудолю́бно подвиза́лся еси́,* въ пѣ́ніихъ, бдѣ́ніихъ и поще́ніихъ,* а́ки безплотный, пребыва́я,* и вели́кимъ о́тцемъ Анто́нію и Тео́до́сію во все́мъ подража́я.* Тѣ́мже прія́лъ еси́ да́ръ исцѣ́ленія отъ Христа́ Бо́га* и сподо́бился еси́ предсто́яннїа престо́лу Его́ небесно́му,* идѣ́же помяни́ въ моли́твахъ богопрі́ятныхъ* чту́щихъ святу́ю па́мь твою́. **[Два́жды.]**

Егда́ изше́лъ еси́ отъ ми́ра, о́тче Лео́нтіе,* и въ оби́тель Пече́рскую притекль еси́,* тогда́ осѣ́нїя вседѣ́тельная благода́ть Ду́ха Свята́го* и въ по́двизѣхъ духо́вныхъ му́жественна и терпѣ́лива тя́ сотвори́,* да, я́ко до́брый вои́нъ Христо́въ,* возмо́жеша бра́тися со враги́ невидимы́ми,* ихже искуше́нїя вся посра́милъ еси́* и, я́ко побѣдоносе́ць,* нетлѣ́ненъ вѣ́нецъ отъ руки́ Вседержи́теля Бо́га прія́лъ еси́.* Тѣ́мже ты́ чте́мъ и ублажа́емъ.

Егда́ приспѣ́ время́ отше́ствїа твоего́ къ Бо́гу,* преподо́бне о́тче на́шъ Лео́нтіе,* тогда́ а́нгели пресвѣ́тліи* придо́ша взя́ти святу́ю ду́шу твою́,* я́ко невѣ́сту чї́сту,* и Са́мъ Христо́съ

Госпо́дь, а́нгеловъ и челоу́ковъ
Влады́ка,* прія́ть тя въ небе́сное Своё
Ца́рство.* Тебѣ́, си́це просла́вленному горѣ́* и
нетла́нїемъ чудотво́рнымъ почте́нному на
земли́,* пѣ́снь хвале́бную съ любу́вію
прїно́симъ,* я́ко заступ́нику на́шему и
предста́телю непосты́дному.

Сла́ва, гла́сь 6:

Преподобне́ о́тче Леонте́, измла́да навы́кнувъ
благоче́стию, яремъ́ Христо́въ на ра́мо твоё
возложи́ль еси́ трудолю́бно, и вслѣ́дъ Влады́ки
твоего́ поте́клъ еси́, раду́ясь. Пече́рская оби́тель
духовно́ тя воспита́, въ не́йже тѣ́ло твоё
нетла́нное оста́вилъ еси́, я́ко насле́діе бога́тое,
ду́хъ же тво́й въ селе́нїихъ небе́сныхъ упоко́енїе
получи́, иди́же со святы́ми Бо́гу предсто́я, проси́
на́мъ спасе́нїе и ве́лю мило́сть.

И ны́нѣ, богоро́диченъ, гла́сь то́йже:

Къ Тебѣ́ моли́твенницѣ́ те́плѣй и неруши́мѣй
стѣнѣ́, всеу́сердно прибѣ́гаемъ, благослове́нная
Богоро́дице Дѣ́во, по́мощи прося́ще: изба́ви на́съ
отъ бѣ́дъ и скорбе́й безме́рныхъ, имаши́ бо
благода́ть и си́лу всѣ́мъ въ ну́ждахъ
посо́бствовать.

НА ЛИТУРГИИ,

Блаженна отъ канона преподобнаго, пѣснь 3-я и 6-я. Прокимень, гласъ 7: Честна предъ Господемъ смѣрть преподобныхъ Его. Стихъ: Что воздамъ Господеви о всѣхъ, яже воздаде ми? Апостоль, къ Галатомъ, зачало 213. Аллилуія, гласъ 6: Блаженъ мужъ, бояйся Господа, въ заповѣдехъ Его восхощетъ зѣло. Стихъ: Сильно на земли будетъ сѣмя его. Евангеліе Луки, зачало 24. Причастень: Въ память вѣчную будетъ праведникъ, отъ слуха зла не убоится.

Источникъ: Печѣрская Минія. [Часть вторая.] — Кіевъ: Въ типографіи Кіево-Печѣрскія Лавры, 2007. — С. 5-22, 369.

